

Na osnovu čl. 3. i 5. Zakona o prenosu poslova medijacije na udruženje medijatora (Službeni glasnik BiH broj 52/05), u vezi sa članom 27. Zakona o postupku medijacije (Službeni glasnik Bosne i Hercegovine br. 37/04), te na osnovu člana 20. Statuta, Upravni odbor Udruženja medijatora u Bosni i Hercegovini donosi

PRAVILNIK O DISCIPLINSKOJ ODGOVORNOSTI MEDIJATORA

I – OPŠTE ODREDBE

Član 1.

Ovim Pravilnikom utvrđuju se pravila disciplinske odgovornosti medijatora za povrede učinjene u obavljanju poslova medijacije i čuvanju ugleda medijatora, vrste disciplinskih povreda, disciplinske mjere, organi za pokretanje i vođenje disciplinskog postupka, tok disciplinskog postupka, zastarjelost pokretanja i vođenja disciplinskog postupka i zastarjelost izvršenja disciplinskih mjera, te postupak izvršenja izrečenih disciplinskih mjera.

Član 2.

Medijatori su individualno odgovorni za savjesno obavljanje poslova medijacije i čuvanje ugleda medijatora.

Član 3.

Disciplinski postupak protiv medijatora uključuje pravo da budu obaviješteni o disciplinskoj prijavi i da se o njoj izjasne, da budu obaviješteni o činjeničnom i pravnom sadržaju prijave, pravo na pravičan postupak, pravo na angažovanje branioca po svom izboru i pravo na sudsku zaštitu pred nadležnim sudom protiv konačne odluke disciplinskog organa.

II – VRSTE DISCIPLINSKIH POVREDA

Član 4.

Prema težini učinjene povrede su lakše i teže disciplinske povrede.

Član 5.

Lakše povrede dužnosti urednog obavljanja poslova medijacije i čuvanje ugleda medijatora su:

1. reklamiranje poslova medijacije suprotno aktima Udruženja medijatora u Bosni i Hercegovini (u daljem tekstu: Udruženja),
2. neprimjereno pridobijanje stranaka,
3. nepostupanje po odlukama i nalogima Udruženja donesenim po normativnim aktima Udruženja,
4. neizvršavanje obaveze kontinuiranog stručnog usavršavanja,
5. neizvršavanje odluka organa Udruženja koje se odnose na jedinstveno postupanje svih medijatora,
6. bilo kakvo kontaktiranje sa strankama suprotno zakonu i Kodeksu
7. neprimjereno postupanje prema drugim medijatorima,
8. posredovanje u predmetima gdje postoji sukob interesa, osim ako stranke nije pretnodno upozorio na tu okolnost i dobio njihovu saglasnost i
9. sve druge povrede koje u sebi ne sadrže elemente teže povrede urednog obavljanja poslova medijacije i čuvanja ugleda medijatora, a ukazuju na povredu Kodeksa etike medijatora.

Član 6.

Teže povrede dužnosti urednog obavljanja poslova medijacije i čuvanja ugleda medijatora su svako teže narušavanje dužnosti, ugleda i Kodeksa i to:

1. očigledno nesavjesno izvršavanje poslova medijacije,
2. obavljanje poslova koji su nespojivi sa ugledom i Kodeksom etike medijatora,
3. povreda dužnosti čuvanja principa tajnosti i povjerljivosti,
4. zahtijevanje naknade veće od propisane tarifom,
5. neopravdano odbijanje preuzimanja poslova medijacije,
6. preuzimanje poslova medijacije suprotno ograničenjima u zakonu,
7. neizvršavanje obaveze kontinuiranog stručnog usavršavanja u periodu od dvije ili više godina uzastopno,
8. obavljanje poslova medijacije za vrijeme privremene zabrane ili za vrijeme trajanja zabrane obavljanja poslova medijacije,
9. narušavanje ugleda, časti ili profesionalnog dostojanstva drugog medijatora,
10. neplaćanje finansijskih obaveza prema Udruženju uprkos prethodno dostavljenoj opomeni.

III – DISCIPLINSKE MJERE

Član 7.

U disciplinskom postupku protiv medijatora mogu se izricati disciplinske mjere, i to:

1. opomena,
2. javna opomena,
3. novčana kazna,
4. zabrana obavljanja poslova medijacije u trajanju od tri mjeseca do dvije godine i
5. brisanje iz Registra

Član 8.

Za lakše povrede mogu se izreći:

1. opomena,
2. javna opomena i
3. novčana kazna u iznosu od 50,00 KM do 500,00 KM.

Za teže povrede mogu se izreći:

1. novčana kazna u iznosu od 500,00 KM do 3000,00 KM
2. zabrana obavljanja poslova medijacije u trajanju od tri mjeseca do dvije godine i
3. brisanje iz Registra.

Član 9.

Disciplinska mjera zabrana obavljanja poslova medijacije u trajanju od tri mjeseca do dvije godine može se izreći počiniocu ako su mu izrečene više od dvije disciplinske mjere za teže povrede.

Član 10.

Disciplinska mjera brisanje iz Registra izriče se za teške oblike težih povreda, a naročito one kojima je prčinjena materijalna šteta strankama, trećim licima ili Udruženju.

Član 11.

Prilikom izricanja disciplinskih mjera za disciplinske povrede uzimaju se u obzir:

1. težina učinjene disciplinske povrede,
2. stepen odgovornosti učinioca,
3. okolnosti pod kojima je učinjena disciplinska povreda,
4. prethodni rad i ponašanje učinioca i
5. druge okolnosti koje mogu uticati na vrstu i visinu disciplinske mjere.

IV – ORGANI POKRETANJA I VOĐENJA DISCIPLINSKOG POSTUPKA

Član 12.

Organi pokretanja i vođenja disciplinskog postupka su:

1. disciplinski tužilac Udruženja,
2. Disciplinsko vijeće Udruženja i
3. Upravni odbor Udruženja.

Član 13.

Disciplinski tužilac Udruženja podnosi prijedlog za pokretanje disciplinskog postupka i zastupa prijedlog pred Disciplinskim vijećem.

Član 14.

Disciplinsko vijeće Udruženja vodi postupak i odlučuje o prijedlogu za pokretanje disciplinskog postupka.

Disciplinsko vijeće Udruženja odlučuje u sastavu od predsjednika Vijeća i dvojice članova iz reda medijatora.

Predsjednik Vijeća rukovodi postupkom.

Član 15.

Upravni odbor Udruženja odlučuje o žalbama na odluke Disciplinskog vijeća Udruženja.

V – POKRETANJE I TOK DISCIPLINSKOG POSTUPKA

Član 16.

Svako fizičko i pravno lice može protiv medijatora podnijeti disciplinsku prijavu disciplinskom tužiocu Udruženja.

Ako je prijava podnesena nekom drugom organu Udruženja, taj organ je dužan prijavu uputiti disciplinskom tužiocu Udruženja, bez odlaganja.

Član 17.

Po prijemu disciplinske prijave disciplinski tužilac Udruženja je dužan da u roku od osam dana zatraži pismeno izjašnjenje od prijavljenog medijatora na okolnosti disciplinske prijave.

Prijavljeni medijator može u roku od osam dana dati pismeno izjašnjenje disciplinskom tužiocu Udruženja.

Član 18.

Ako disciplinski tužilac nađe da radnje prijavljenog predstavljaju krivično djelo, dužan je o tome obavijestiti nadležnog tužioca bez odlaganja.

Član 19.

Nakon izjašnjenja prijavljenog, odnosno protekom roka za izjašnjenje, disciplinski tužilac Udruženja može odbaciti prijavu ako nađe da prijavljeno djelo nije disciplinska povreda, ako je nastupila zastarjelost disciplinskog gonjenja ili ako postoje drugi razlozi koji isključuju disciplinsko gonjenje.

Rješenje o odbacivanju disciplinske prijave, disciplinski tužilac Udruženja dostavlja podnosiocu prijave i prijavljenom.

Član 20.

Ako ne odbaci disciplinsku prijavu, disciplinski tužilac može preduzeti potrebne radnje, saslušanje svjedoka, saslušanje oštećenog, prikupljanje obavještenja od nadležnih organa i druge radnje u cilju utvrđivanja osnovanosti disciplinske prijave.

Radnje iz stava 1. ovog člana disciplinski tužilac Udruženja je dužan preduzeti bez odlaganja. Nakon preduzimanja radnji iz stava 1. ovog člana disciplinski tužilac Udruženja može odbaciti prijavu iz razloga navedenih u članu 19. Ovog Pravilnika ili odbaciti prijavu ako nema dovoljno dokaza da je prijavljeni učinio disciplinsku povredu.

Član 21.

Kad disciplinski tužilac Udruženja nađe da postoji dovoljno dokaza iz kojih proizilazi osnovana sumnja da je prijavljeni učinio disciplinsku povredu, pripremiće i uputiti disciplinskom vijeću Udruženja prijedlog za pokretanje disciplinskog postupka.

Član 22.

Prijedlog za pokretanje disciplinskog postupka sadrži:

1. ime i prezime medijatora, sa ličnim podacima,
2. opis radnje iz koje proizlaze obilježja disciplinske povrede, vrijeme, mjesto i način izvršenja povrede, kao i ostale okolnosti potrebne da se disciplinska povreda što preciznije odredi,
3. naziv disciplinske povrede sa navođenjem odredbe kojom je ona propisana,
4. prijedlog o dokazima koje treba provesti na sjednici Disciplinskog vijeća Udruženja.

Uz prijedlog iz stava 1. ovog člana dostavljaju se predloženi dokazi.

Član 23.

Nakon prijema prijedloga iz člana 22. ovog Pravilnika, Disciplinsko vijeće Udruženja će u roku od 15 dana zakazati sjednicu Vijeća.

Na sjednicu iz stava 1. ovog člana se pozivaju disciplinski tužilac Udruženja, medijator i njegov branilac, ukoliko ga ima.

Poziv medijatoru i braniocu se dostavlja uz prijedlog iz člana 22. ovog Pravilnika.

Na sjednicu Vijeća mogu se pozvati predloženi svjedoci.

Član 24.

Sjednica Vijeća se može održati i u odsustvu uredno pozvanog medijatora i njegovog branioca, ako on izostanak nije opravdao do početka sjednice Vijeća.

Član 25.

Sjednica Vijeća počinje izlaganjem prijedloga od strane disciplinskog tužioca Udruženja.

Nakon izlaganja prijedloga, medijator ili njegov branilac mogu dati izjašnjenje o navodima prijedloga.

Nakon toga, disciplinski tužilac Udruženja izlaže dokaze iz prijedloga, a potom medijator ili njegov branilac sprovode dokaze kojim pobijaju navode prijedloga.

Vijeće može odlučiti, po izjašnjenju stranaka, da se pročitaju iskazi svjedoka dati pred disciplinskim tužiocem Udruženja.

Vijeće može odbiti izvođenje predloženog dokaza.

Nakon sprovođenja dokaznog postupka, disciplinski tužilac Udruženja, medijator ili njegov branilac mogu dati završnu riječ.

Nakon datih završnih riječi, Vijeće se povlači na vijećanje i glasanje radi donošenja odluke.

Član 26.

Vijeće objavljuje odluku odmah nakon vijećanja i glasanja.
Odluka se donosi u obliku rješenja.

Član 27.

Vijeće može odlučiti da medijatora oglasi krivim i izrekne mu disciplinsku mjeru, ili odbiti prijedlog.

Član 28.

U roku od 15 dana od objavljivanja odluke Vijeće dostavlja pismeni otpravak rješenja disciplinskom tužiocu, medijatoru i braniocu.
Protiv rješenja iz stava 1. ovog člana može se izjaviti žalba u roku od 15 dana od dana dostavljanja rješenja.
Žalba se izjavljuje Upravnom odboru Udruženja, putem Disciplinskog vijeća Udruženja.
Neblagovremenu ili nedozvoljenu žalbu odbacit će predsjednik Disciplinskog vijeća Udruženja.
Disciplinsko vijeće Udruženja žalbu sa svim spisima predmeta odmah dostavlja Upravnom odboru Udruženja.

Član 29.

Neblagovremenu ili nedozvoljenu žalbu odbaciće predsjednik Upravnog odbora, ukoliko to nije učinjeno u smislu člana 28. stav 4. ovog Pravilnika.
Upravni odbor Udruženja u roku od 30 dana zakazuje sjednicu o kojoj se obavještavaju disciplinski tužilac Udruženja, medijator i njegov branilac.
Nedolazak stranaka i branilaca, koji su uredno obaviješteni, ne sprečava održavanje sjednice Upravnog odbora Udruženja.

Član 30.

Sjednica Upravnog odbora Udruženja počinje izlaganjem podnosioca žalbe, a poslije toga disciplinski tužilac Udruženja izlaže odgovor na žalbu.
Upravni odbor Udruženja može zatražiti od stranaka i branilaca potrebna objašnjenja u vezi sa navodima žalbe i navodima odgovora na žalbu.
Stranke i branilac mogu predložiti da se pročitaju pojedini spisi.

Član 31.

Upravni odbor Udruženja može da odbije žalbu kao neosnovanu i potvrdi prvostepeno rješenje ili preinači prvostepeno rješenje.
Pismeni otpravak rješenja dostavlja se strankama i braniocu u roku od 30 dana.

Član 32.

Evidenciju o izrečenim disciplinskim mjerama vodi Upravni odbor Udruženja.

Član 33.

Izrečene disciplinske mjere za lakše povrede brišu se iz evidencije protekom roka od dvije godine od dana pravosnažnosti rješenja.
Izrečene disciplinske mjere za teže povrede brišu se iz evidencije protekom roka od četiri godine od dana pravosnažnosti rješenja.
Rješenje o brisanju donosi Upravni odbor Udruženja.

VI – ZASTARJELOST POKRETANJA I VOĐENJA DISCIPLINSKOG POSTUPKA I ZASTARJELOST IZVRŠENJA DISCIPLINSKIH MJERA

Član 34.

Pokretanje i vođenje disciplinskog postupka protiv medijatora ne može se preduzeti, niti voditi kad protekne:

1. jedna godina od izvršenja lakše povrede i
2. dvije godine od izvršenja teže povrede.

Kada povreda ima obilježja krivičnog djela, rok zastarjevanja, pokretanja i vođenja disciplinskog postupka izjednačava se sa rokom zastarjevanja propisanim za krivično djelo.

Član 35.

Zastarjelost izvršenja disciplinskih mjera za lakše povrede nastupa protekom jedne godine od dana pravosnažnosti rješenja kojim je disciplinska mjera izrečena.

Zastarjelost izvršenja disciplinskih mjera za teže povrede nastupa protekom dvije godine od dana pravosnažnosti rješenja kojim je disciplinska mjera izrečena.

Član 36.

Zastarjelost se prekida svakom radnjom koja se preduzima radi pokretanja disciplinskog postupka ili izvršenja disciplinske mjere.

U svakom slučaju zastarjelost nastupa kada protekne dva puta više vremena nego što je određeno za zastarjelost pokretanja disciplinskog postupka ili izvršenja disciplinske mjere.

VII – IZVRŠENJE DISCIPLINSKE MJERE

Član 37.

Izvršenje disciplinskih mjera sprovodi Upravni odbor Udruženja.

Izvršenje javne opomene sprovodi se objavljivanjem u listu “Medijator”.

Novčana kazna izvršava se uplatom na žiro račun Udruženja.

Ukoliko medijator u roku određenom u rješenju o novčanoj kazni ne plati kaznu, Upravni odbor Udruženja će donijeti rješenje o privremenoj zabrani obavljanja poslova medijacije.

Rješenje o privremenoj zabrani obavljanja poslova medijacije će se opozvati na prvoj sjednici Upravnog odbora Udruženja, nakon izvršene uplate novčane kazne.

Zabrana obavljanja poslova medijacije sprovodi se zabilježbom u Registru.

VIII – PRELAZNE I ZAVRŠNE ODREDBE

Član 38.

Ovaj Pravilnik stupa na snagu narednog dana od dana objavljivanja u “Službenom glasniku BiH”.

27.2.2006. god.
Banja Luka

Predsjednik Udruženja
Goran Salihović
